

Yexus Khetos

Ntawm

Txoj Moo Zoo

Yexus Khetos

Ntawm

Txoj Moo Zoo

Yexus

Lub neej thiab tes haujlwm

*Sau raws li **Mathais, Malakaus, Lukas, thiab Yauhas***

Muab sau ua ib zag keebkwm raws li tej lus uas neeg siv
nyob rau tiam no

los ntawm
William F. Beck



**Phau Yexus Khetos ntawm Txoj Moo Zoo no yog txhais los ntawm phau
The Christ of the Gospels uas sau los ntawm William F. Beck.**

**Concordia Publishing House, St. Louis, Missouri yog cov uas xub xub luam
phau *The Christ of the Gospels* tawm nyob rau xyoo 1958.**

**Tsevneeg Beck tau tso cai rau muab txhais thiab luam tawm ua lus Hmoob,
tsevneeg Beck yog cov uas tuav txojcai luam.**

**Kxh. Vamhmoo Lauj yog tus uas muab txais los ua lus Hmoob nyob rau
xyoo 2011.**

Copyright © 2011

Luam tawm xyoo 2011

ISBN 1-931891-36-2

**Vajtswv tej lus uas nyob rau hauv Phau Txooj Moo Zoo no yog txhais los
ntawm Kxh. Vamhmoo Lauj thiab siv los ntawm nws txoj kev tso cai.**

Lus coj

Yog tias hnuv no Yexus nrog peb tham, nws yuav tsis siv cov lus uas nws tau siv yav dhau los lawm. Nws yuav siv cov lus uas peb niaj hnuv siv nimno los txuas lus rau peb. Lub homphiaj ntawm phau ntawv no yog cia Yexus hais rau peb txog qhov tseeb ntawm Vajtswv Txojlus.

Tej lus uas nws tau hais thiab tes haujlwm uas nws tau ua los lawm raug muab teev cia los ntawm Mathais, Malakas, Lukas, thiab Yauhas. Yog peb xav paub txog Yexus zaj, peb yuav tau nyeem kom tagrho plaub phau Txoj Moo Zoo. Tsuas yog Mathais thiab Lukas thiaj li qhia peb txog qhov uas Yexus yug xwb. Tsuas yog Yauhas thiaj li qhia peb txog zaj uas Laxalaus sawv hauv qhov tuag rov los thiab pluag tshais uas Yexus nrog nws cov thwjtim noj uake ntawm ntug dej xwb. Peb tug ntawm cov sau no, Mathais, Malakaus, thiab Lukas thiaj li qhia peb txog Tustswv Roojmov (pluag hmo) xwb. Tiamsis lawv plaub leeg puavleej sau txog qhov uas Yexus raug tsimtxom, tuag, thiab sawv rov los.

Plaub phau Txoj Moo Zoo sau mus tib kis tau licas? Plaub tug uas sau, sau txog Yexus tes haujlwm ib hnuv rau ib hnuv sib txawv licas? Tes haujlwm uas tsuas yog ib tug sau qhia peb xwb ho zoo licas? Tej zoo li no yog tej uas yuav tau muab coj los piav dua kom meej thiab kom totaub zoo. Phau ntawv no yuav ua rau koj pom tseeb thiab paub tseeb tias txhua yam hauv plaub phau Txoj Moo Zoo puavleej mus uake thiab mus tib kis – yog muab sau dua ua ib zaj keebkwm xwb. Zaj lus uas hais txog Yexus lub neej thaum yug mus txog ntua thaum nws rov mus rau Leejtxiv lawm.

Zaj keebkwm uas hais txog Yexus lub neej no yog ib zaj keebkwm uas tseeb, yog tej yam uas koj yuav tsis muaj peevxwm pom tau tsis hais hauv “ntiajteb los yog hauv nruab tivtxwv,” yog dhau ntawm Vajtswv txojlus lawm. Nws yog zaj keebkwm uas hais txog Vajtswv Leejtub, tus uas hlub peb thiab muab nws tuskheej los rau (tuag theej) peb. Nws yog Vajtswv Leejtub, tus uas neeg pom nws tim ntsej tim muag, yogli cia nws qhia peb, thiab thaum nws qhia rau peb txog qhov uas nws muab nws cov ntshav coj los ntxuav peb tej kev txhaum, peb cia li cia nws hais rau peb tias, “*Nej tej kev txhaum twb raug zam lawm.*” Thiab cia nws lub hwjchim los rau hauv peb lub neej, nws suav tias peb yog nws tug, thiab yuav tsis muaj leejtwg chua tau peb tawm ntawm nws lub xubntiag mus ib txhis. Amen.

Yexus Lub Neej

1. Yexus lub neej thaum yau.....	11
2. Yauhas thiab Yexus	23
3. Thawj zaug mus rau Kalilais	35
4. Mus rau Kalilais zaum ob thiab zaum peb	61
5. Yexus tawm ntawm Kalilais mus.....	83
6. Nyob hauv Yudia.....	105
7. Nyob rau hauv Pelias.....	127
8. Mus rau Yeluxalees.....	137
9. Nyob hauv Yeluxalees	151
10. Yexus kev npaj zaum kawg.....	175
11. Peb Tus Cawmdim raug kev tsimtxom	189
12. Peb Tus Cawmdim twb sawv rov los lawm.....	209

Pib zaj keebkwm

Txoj Moo Zoo

uas hais txog

Yexus Khetos

Vajtswv Leejtub

Lukas hais tias:

Muaj coob leej tau siv sijhawm los npaj thiab sau ib zaj keebkwm uas tau tshwm muaj nyob rau hauv peb, ibyam li peb twb tau hnov los ntawm cov uas tau hnov los ntawm cov thwjtim thiab cov ntseeg tiam thaum ub lawm, thiab cov uas yog Vajtswv li tubqhe. Twb yog vim li no, kuv los tibyam, kuv thiaj siv sijhawm los kawm thiab rov coj tej zaj keebkwm uas cov thwjtim tau sau tseg lawm coj los sau ua ib zaj keebkwm uas yog hais txog zaj uas Vajtswv los rau neeg, kom tus uas nyeem totaub yoojyim, thiab paub txog qhov tseeb ntawm Vajtswv txojlus.

1

Yexus lub neej thaum yau

Tus timtswv los rau Xekhaliyas

Thaum Helauj ua vajntxwv nyob rau hauv lub tebchaws Yudia, muaj ib tug povthawj hlob hu ua Xekhaliyas, nws yog ib tug ntawm pawg povthawj hlob uas hu ua Anpintas. Nws tus pojniam yog Aloos cajces, thiab nws lub npe hu ua Elizanpev. Nkawd ob leeg yog neeg ncajnrees rau ntawm Vajtswv xubntiag, nkawd ua lub neej raws li Vajtswv tej lus qhia.

Tiamsis nkawd tsis muaj menyuam, vim rau qhov Elizanpev tsis muaj peevxwm xeeb tau menyuam thiab nkawd twb laus laus lawm.

Muaj ib zaug Xekhaliyas raug ua tes haujlwm uas tu Vajtswv nyob rau hauv chav dawbhuv – ua ntej ntawm Vajtswv xubntiag. Raws li cov povthawj hlob tej kevlis kevcav, nws raug xaiv los ntawm coob tus povthawj hlob kom mus tu Vajtswv tes haujlwm uas yog hlawv tej khoom fij, khoom tsw qab pub rau Vajtswv. Tej neeg sawvdaws puavleej nyob sab nraud thov Vajtswv thaum nws tseem tabtom hlawv tej khoom fij pub rau Vajtswv.

Lub sijhawm ntawd, nws pom Tustswv tus timtswv sawv sab xis ntawm lub thaj uas hlawv khoom fij. Xekhaliyas poob siab thiab ntshai heev rau qhov nws pom tus timtswv.

Tus timtswv hais rau nws tias, *“Tsis txhob ntshai, Xekhaliyas, koj tej lus thov*

Judea, 6 B.C.

twb raug hnov lawm.”^{1*} Koj thiab koj tus pojniam Elizanpev yuav muaj ib tug tub, thiab koj yuav tsum tis nws lub npe hu ua² Yauhas. Nws yuav yog koj txoj kev zoosiab thiab txoj kev kajsiab, thiab coob leej yuav zoosiab uas nws yug los.

“Nws yuav yog ib tug uas tseemceeb rau Tustswv. *Nws yuav tsis haus cawv.*³ Nws yuav puvnpo rau Vajntsujplig Dawbhuv ua ntej nws tseem tsis tau yug los. Thiab nws yuav coj coob leej hauv Ixayees rov qab los rau Tustswv uas yog lawv tus Vajtswv. Nws yuav mus ua ntej Tus uas muaj Vajntsujplig thiab muaj *Eliyas* lub *hwjchim, kom cov uas yog txiv hlub lawv tej menyuum,*⁴ thiab kom cov uas tawv ncauj xav li cov uas ncajnrees – thiab nws yuav npaj tej neeg kom txhij rau Tustswv.”

Xekhaliyas nug tus timtswv tias, “Yuav ua licas kuv thiab li ruaj siab rau tej no? Kuv yog ib tug txivneej laus laus lawm, thiab kuv tus pojniam los twb laus laus lawm thiab.”

Tus timtswv teb nws tias, “Kuv yog Kali-ee! Kuv sawv ua ntej ntawm Vajtswv lub xubntiag thiab raug txib los hais rau koj thiab qhia koj txog txoj xov zoo no. Thiab txij no mus, koj yuav hais tsis tau lus thiab yuav tsis muaj peevxwm tham tau mus txog hnuv uas tej no tshwm los, vim koj tsis ntseeg tej uas kuv tau hais rau koj lawm. Tiamsis tej ntawd yeej yuav muaj tseeb thaum txog lub sijhawm lawm.”

Lub sijhawm ntawd tej neeg tseem tos Xekhaliyas nyob rau sab nraud thiab lawv poob siab tias ua licas nws yuav nyob hauv qhov chaw dawbhuv ntev ua luaj. Thaum Xekhaliyas tawm los, nws tsis muaj peevxwm hais tau lus rau lawv. Yogli lawv paub lawm tias nws yeej pom ib yam txujci tseemceeb nyob rau hauv chaw dawbhuv lawm xwb. Nws saib lawv thiab nws hais tsis tau lus rau lawv li. Thaum nws lub luag haujlwm tiav lawm, nws txawm rov mus tsev. Tomqab ntawd, nws tus pojniam Elizanpev txawm xeebtub, thiab tau tsib lub hlis Elizanpev tsis tawm rooj mus qhov twg li. Nws hais tias, “Tustswv ua tej no rau kuv. Kuv txajmuag rau tej neeg, tiamsis nws muaj lub siab hlub thiab pab kuv, thiab kuv yuav tsis txajmuag ntxiv lawm.”

Tus timtswv los rau Maivliag

Tomqab ntawd tsib lub hlis Vajtswv tau txib nws tus timtswv Kali-ee los rau lub xeev Kalilais uas hu ua Naxale, mus rau tus nkaujxwb uas twb qhaib nrog tus txivneej npe hu ua Yauxej lawm, uas yog Daviv ib tug xeebntxwv. Tus nkaujxwb ntawd npe hu ua Maivliag.

* Tej kablus uas sau ua cov ntawv vau hauv tej soblus yog rho tawm hauv Vajtswv txojlus Phau Qub los. Saib mus rau nplooj 221 thiab 222.

Tus timtswv los rau hauv Maivliag lub tsev thiab hais rau nws tias, “Tus uas tau txais koobhmoov, Tustswv nrog nraim koj nyob.”

Thaum tus timtswv hais li ntawd tag lawm Maivliag ua tibzoo xav saib yog vim licas tus timtswv ho hais li ntawd – tej lus ntawd yog dabtsi tiag?

Tus timtswv hais rau Maivliag tias, “Tsis txhob ntshai, Maivliag, Vajtswv yog tus uas ua zoo rau koj. *Koj yuav pom, koj yuav xeeb menyuum thiab xeeb ib tug tub, thiab koj yuav tis nws lub npe hu ua* ⁵ Yexus. Nws yuav yog ib tug uas tseemceeb thiab yuav hu ua *Leejtub ntawm Vajtswv* tus uas muaj hwjchim loj kawg nkaus. Thiab Tustswv yuav muab *lub zwmtxwv* uas yog nws yawg koob *Daviv* lub rau nws. Nws yuav ua Vajntxwv kav Yakhauj cajces mus ib txhis, thiab nws lub tebchaws *yuav nyob mus ib txhis tsis paub kawg.*” ⁶

Maivliag nug tus timtswv ntawd tias, “Yuav ua licas muaj tau li ntawd? Kuv twb tsis muaj txiv?”

Tus timtswv teb tias, “Vajntsujplig Dawbhuv yuav los rau koj, thiab lub hwjchim ntawm tus Vajtswv uas muaj hwjchim loj kawg nkaus yuav los roos koj. Thiab vim lino tus metub yuav raug hu ua tus dawbhuv thiab Vajtswv Leejtub. Nimno Elizanpev, koj tus phauj, nws twb laus laus lawm, tiamsis nws twb xeebtub lawm thiab. Tej neeg hu nws tias tus uas xeeb tsis tau menyuum, tiamsis nws twb xeebtub tau rau lub hli lawm. *Tsis muaj ib yam dabtsi uas Vajtswv ua tsis tau.*” ⁷

Maivliag teb tias, “Kuv yog Tustswv tus ntshais qhev xwb, thov kom muaj raws li tej uas koj tau hais lawm.” Ces tus timtswv txawm ncaim ntawm Maivliag mus lawm.

Maivliag mus saib Elizanpev

Yogli Maivliag txawm maj nroos mus saib nws tus phauj Elizanpe hauv cov Yudai lub moos.

Thaum Elizanpe hnov dheev tias Maivliag tuaj lawm, nws tus menyuum nti hauv nws lub tsev menyuum. Thiab Elizanpev puvnpo rau Vajntsujplig Dawbhuv, thiab nws hais nrov nrov tias, “Hauv ib tsoom pojniam koj tau khoobhmoov, thiab tus menyuum hauv koj lub tsev menyuum tau koobhmoov. Ua cas tej no tshwm los rau kuv, uas yog kuv Tustswv niam tseem tuaj saib kuv thiab? Lub sijhawm uas kuv hnov koj tej lus noj qab nyob zoo, tus menyuum hauv kuv lub tsev menyuum nti nrog rau txoj kev xyivfab. Thiab koj zoosiab vim koj ntseeg tias Tustswv yuav ua tej uas nws twb tau cog lus tseg rau koj lawm rau koj.”

March, 5 B.C.

Maivliag hais tias:

**“Kuv lub siab qhuas Tustswv,
Thiab kuv *tus ntsujplig xyivfab hauv Vajtswv, uas yog kuv tus Cawmdim,* ⁸**

**Vim rau qhov nws muaj lub siab hlub *nws tus ntxhais qhev uas txo hwjchim.* ⁹ Saib
maj, txij no mus txhua tiam neeg yuav hu kuv tias tus uas tau koobhmoov.**

**Nws tau ua tej yam uas tseemceeb rau kuv –
*Nws yog tus uas muaj hwjchim
Thiab tus uas lub npe dawbhuv* ¹⁰
thiab tus uas ib txwm hlub cov uas hwm nws. ¹¹**

**“Lub hwjchim yog tes haujlwm uas nws tau ua los ntawm *nws txhais cajnpab.*
Nws ua rau cov uas khavtheeb hauv lawv lub siab *tawg ua sab ua sua.* ¹² Nws txo cov
thawj *coj uas muaj zog nqis saum lawv lub zwmtxwv
thiab tsa cov uas poob qis sawv.* ¹³**

***Nws pub yam uas zoo rau cov uas tshaib tshaib nqhis nqhis tsau npo,* ¹⁴
thiab nws ua kom cov uas npluanuj mus tes dawb tes npliag.**

**“*Nws los pab nws tus tubqhe Ixayees,* ¹⁵
Vim rau qhov nws xav kom *Ixayees nco txog nws txoj kev hlub,* ¹⁶**

***Txoj kev hlub uas nws tau cog tseg rau Anplahas
thiab rau Anplahas cov tubqhe mus ib txhis.”* ¹⁷**

Maivliag nrog Elizanpev nyob tau peb lub hlis nws mam li rov mus tsev.

Yug Yauhas

**Txog lub sijhawm uas Elizanpev yug menyuam, thiab nws yug tau ib tug me
tub. Nws tej nruabze thiab tej kwvtij neej tsa hnov tias Tustswv txoj koobhmoov los
rau nws, thiab lawv puavleej nrog nws zoosiab.**

**Thaum tus menyuam muaj yim hnuv lawm, nkawd koj mus ua kevcai txiav.
Lawv yuav muab nws hu ua Xekhaliyas li nws txiv. Tiamsis nws niam hais tias,
“Tsis tau!” thiab nws hais ntxiv tias, “Tus metub lub npe yuav tsum hu ua Yauhas.”**

Judea

Lawv hais rau nws tias, “Tiamsis twb tsis muaj leejtwg hauv koj cov kwvtij hu li ntawd li ne.”

Yog li lawv piav tes rau Xekhaliyas saib nws xav kom tis lub npe licas rau tus metub. Xekhaliyas thiaj li kom lawv muab ib daim txiag sau ntawv los rau nws thiab nws sau tias, “Nws (tus metub) lub npe hu ua Yauhas.” Lawv sawvdaws xav tsis thoob li.

Tamsim ntawd Xekhaliyas txawm hais tau lus thiab tham tau dua. Nws thiaj li pib hais tias, cia li qhuas Vajtswv.

Tej neeg uas nyob ib ncig ntawd ntshai kawg li. Thiab tej neeg uas nyob raws tej tojroob ntawm Yudai tebchaws puavleej tham txog tej xwmtxheej no. Tej neeg uas tau hnov, khaws tej no cia rau hauv lawv lub siab: Thiab lawv nug tias, “Tus metub no yuav zoo licas rau tom ntej? Rau qhov Tustswv txhais tes nrog nraim nws.”

Xekhaliyas puvnpo rau Vajntsajplig Dawbhuv, thiab nws txawm cev Vajtswv lus tias:

Qhuas Tustswv uas yog cov Ixayees tus Vajtswv, ¹⁸
vim rau qhov nws tau los saib *nws haivneeg*
thiab tau npaj *ib yam khoom txhiv* rau lawv. ¹⁹

Nws tau muab ib tug xeebntxwv ntawm nws tus tubqhe Daviv
los ua peb *tus Cawmdim uas yog tus kovyeej.* ²⁰

Li nws twb tau hais tseg ntev los lawm rau cov xibhwv cev
Vajtswv lus uas dawbhuv tias, *nws yuav pab peb dim ntawm peb cov*
yeebncuab, dim ntawm lub hwjchim ntawm txhua tus uas ntxub peb. ²¹

Nws xav qhia txoj kev hlub rau peb pojkoob yawmtxwv ²²
thiab ceev nws txoj luscog tseg uas dawbhuv,
txoj luscog tseg uas nws tau cog rau peb yawgkoob Anplahas
kom peb dim ntawm peb *cov yeebncuab.* ²³
thiab peb cia li tu nws tsis txhob ntshai nws,
cia li tu nws hauv txoj kev dawbhuv thiab txoj kev ncajnnees ntawm nws lub
xubntiag kom tag peb sim neej.

“Thiab koj, metub, yuav raug hu tias yog ib tug cev Vajtswv lus rau tus
Vajtswv uas muaj hwjchim loj kawgnkaus.
Koj yuav *mus ua ntej Tustswv, npaj tej kev rau nws,* ²⁴
qhia nws haivneeg tias lawv muaj peevxwm dim tau
los ntawm txoj kev zam txim rau lawv tej kev txhaum,

June, 5 B.C.

Vim rau qhov peb tus Vajtswv yog tus uas hlub peb
 thiab yuav ua rau lub hnuv uas ci ntsa ib ntawm ntuj ceebtsheej
 tshwm hauv peb tuaj,
Ci mus rau cov uas nyob hauv qhov tsaus ntuj
*Thiab nyob rau hauv tus duab ntxoov ntxoo ntawm txoj kev tuag.*²⁵
*thiab koj peb txhais kotaw mus rau txoj kev thajyeeb.”*²⁶

Tus timtswv los rau Yauxej

Yexus niam uas yog Maivliag tau qhaib nrog Yauxej lawm. Tiamsis ua ntej nkawd nyob uake, Maivliag twb xub xeebtub los ntawm Vajntsujplig Dawbhuv lawm. Yauxej, tus uas tau qhaib Maivliag lawm, yog ib tug neeg zoo thiab nws tsis xav ua rau Maivliag poob ntsej muag. Yog li Yauxej thiaj li thim nkawd tej lus qhaib ntsiag to.

Yauxej nyuajsiab heev thiab nws pw tsaug zog, nyob rau hauv nruab dabntub. Tustswv ib tug timtswv los hais rau nws tias, “Yauxej, Daviv tus xeebntxwv, tsis txhob ntshai mus koj Maivliag los ua koj tus pojnaim; tus Metub yog los ntawm Vajntsujplig Dawbhuv los. Maivliag yuav yug ib tug Tub, thiab koj yuav tis nws lub npe hu ua Yexus, vim rau qhov nws yuav cawm nws haivneeg tawm ntawm lawv tej kev txhaum. Tej no tshwm tuaj kom tej uas Tustswv tau hais tseg rau cov xibhwb cev Vajtswv lus lawm thiaj li tiav: *Tus nkaujxwb yuav xeeb menyuam thiab muaj ib tug Tub, thiab nws yuav raug hu ua Emanu-es,*”²⁷ uas txhais tias “Vajtswv nrog peb nyob.”

Thaum Yauxej tsim los, nws txawm ua raws li tej uas tus timtswv tau hais rau nws lawm. Nws mus koj Maivliag los ua nws tus pojniam tiamsis nkawd tsis ua niamtxiv mus txog thaum tus metub yug. Thiab nws hu tus metub ua Yexus.

Yexus yug

Nyob rau lub sijhawm ntawd huabtais Aukata tawm kevcai kom tshawb xyuas saib tej pejxeem hauv nws lub tebchaws muaj coob npaum licas. No yog thawj zaug uas muaj kev tshawb xyuas, thiab yog thaum Khilinia-us ua tus kav tebchaws Xilias.

Yauxej thiab Maivliag nkawd thiaj li taug kev tawm hauv lub moos Naxalev xeev Kalilais mus rau Daviv lub moos uas hu ua Npelehees, nyob hauv Yudia, vim rau qhov nkawd yog Daviv li xeebntxwv.

Nazareth, Bethlehem

Thaum nkawd mus txog nrad, twb txog lub sijhawm uas Maivliag yuav los so lawm. Maivliag thiaj li yug nws thawj tug tub, thiab nws muab qhwv thiab muab tso pw rau hauv ib lub dabzaub vim rau qhov nyob rau nrad tej tsev so puv tag lawm.

Cov yug yaj

Muaj ib co yug yaj nyob tsis deb ntawm qhov chaw nkawd so ntawd, lawv yug yaj nyob rau tom nras thiab zov lawv cov yaj thaum hmo ntuj.

Thiab Tustswv tus timtswv sawv ntawm lawv ib sab, thiab Tustswv lub hwjchim ci rau lawv. Lawv ntshai kawg li. Tus timtswv hais rau lawv tias, “Tsis txhob ntshai, kuv coj txoj xov zoo los rau nej. Ib txoj kev zoo siab yuav los rau tej neeg thoo plaws: Tus Cawmdim, tus uas yog Khetos tus uas yog Tustswv, hnub no nws twb yug los rau hauv Daviv lub moos lawm. Thiab nyob rau lub moos ntawd nej yuav nrhiav tau nws: Nej yuav pom tus menyuam mosliab uas muab qhwv lawm thiab muab tso pw rau hauv ib lub dabzaub.”

Tamsim ntawd muaj ib pab timtswv saum ntuj ceebtsheej los, lawv qhuas Vajtswv thiab hais tias: “Lub koobmeej yog rau Vajtswv tus uas nyob saum ntuj ceebtsheej uas siab tshaj plaws, thiab nyob rau hauv ntiajteb txoj kev kajsiab los rau cov neeg uas Vajtswv txaus siab rau!”

Thaum cov timtswv ncaim ntawm lawv thiab rov mus rau saum ntuj lawm, cov yug yaj ib leeg hais rau ib leeg tias, “Tustswv tau hais rau peb txog yam uas tshwm los. Yog li, peb cia li mus rau Npelehees thiab mus saib.”

Lawv thiaj li maj nroos mus rau hauv Daviv lub moos thiab mus nrhiav txog thaum lawv pom Maivliag thiab Yauxej, thiab pom tus metub mosliab uas pw hauv lub dabzaub. Thaum lawv pom tus Metub lawm, lawv thiaj li mus qhia rau lwm tus txog tej uas lawv tau pom. Thiab txhua tus uas tau hnov puavleej xav tsis thoo txog tej uas cov yug yaj qhia rau lawv.

Tiamsis Maivliag khaws tej no cia rau nruab siab thiab niaj hnub nco txog tej uas tshwm los no.

Cov yug yaj rov qab mus rau nram nras lawm, lawv ua Vajtswv tsaug thiab qhuas Vajtswv rau txhua yam uas lawv tau hnov thiab tau pom lawm. Tej uas tshwm los puavleej muaj raws li tej uas tus timtswv tau hais qhia rau lawv lawm.

Nyob rau hauv lub Tuamtsev

Thaum tus metub muaj yim hnuv lawm Maivliag thiab Yauxej koj tus metub mus ua kevcai txiav, thiab Yauxej tis tus metub lub npe hu ua Yexus raws li tus timtswv twb tau hais rau nws ua ntej tus metub yug los lawm.

Thaum txog lub sijhawm uas lawv yuav ua *kevcai ntxuav* (kevcai dawbhuv)²⁸ raws li Mauxes tej kevcai, Yauxej thiab Maivliag tau koj Yexus mus rau pem Yeluxalees thiab muab nws fij rau Vajtswv (raws li Tustswv tau hais rau cov neeg Ixayees lawm: *Thawj tug tub uas yug los raug hu uas tus dawbhuv ntawm Tustswv*²⁹) thiab yuav tau fij tej khoom fij raws li Tustswv tej kevcai, *ib nkawm nquab taug losyog ob tug rhaws nquab nyeg.*³⁰

Nyob hauv Yeluxalees muaj ib tug txivneej npe hu ua Xime-ooos. Nws yog ib tug neeg ncajnrees, ntshai Vajtswv thiab tos ntsoov Tus uas yuav los cawm cov neeg Ixayees – pab kom lawv dim ntawm txoj kev quabyuam. Vajntsujplig Dawbhuv nrog nraim nws nyob. Vajntsujplig Dawbhuv twb hais rau Xime-ooos lawm tias ua ntej nws tuag, nws yuav pom tus Cawmdim, tus uas Vajtswv txib los (cawm neeg ntiajteb.)

Vajntsujplig Dawbhuv tshoov nws lub siab, nws thiaj li mus rau hauv lub tuamtsev. Thaum Yexus txiv thiab niam koj nws tuaj hauv lub tuamtsev, koj tuaj fij raws li Mauxes tej kevcai. Xime-ooos muab tus metub puag rau hauv nws cajnpab thiab ua Vajtswv tsaug, thiab hais tias:

“Tustswv, nimno thov koj cia koj tus tubqhe mus kajsia lug li koj twb tau coglus tseg lawm,
vim rau qhov kuv lub qhov muag twb pom koj txoj *kev cawmdim* lawm,³¹
uas koj twb tau npaj rau txhua tus neeg kom pom,
kom qhov kaj ci rau lwm haivneeg,
thiab lub *koobmeej* ntawm koj haivneeg *Ixayees.*”³²

Yexus txiv thiab niam xav tsis thooob rau tej uas Xime-ooos tau hais. Tomqab ntawd Xime-ooos foom koobhmoov rau tus metub thiab hais rau Maivliag tias, “Tej no yog tej uas tus metub twb raug tsa lawm: Coob leej hauv Ixayees yuav vau thiab sawv dua vim yog nws; coob leej yuav tawmtsam nws, nws yuav nthuav tej uas neeg xav hauv lawv nruab siab. Koj lub siab yuav mob lwj ntsuav yam li rab ntaj hlais koj txojtia.”

Annas, ib tug pojniam cev Vajtswv lus, nyob hauv lub tuamtsev tibyam. Nws yog Fanu-es tus ntxhais, uas yog xeem Asaws. Nws twb laus laus lawm. Thaum

nws tseem yog ib tug ntxhais, nws yuav ib tug txiv thiab nws nyob nrog tus txiv ntawd tau xya lub xyoo. Nws ua pojntsuam los txog thaum nws muaj yimcaum plaub xyoo, nws yeej tsis tau tawm hauv lub tuamtsev li, thiab nws teevtiam Tustswv nruab hnuv thiab hmo ntuj, ua kevcai yoo mov thiab thov Vajtswv. Nws los kuj tawm los ua Vajtswv tsaug, thiab qhia txog tus metub rau tej neeg uas tos ntsoov kom haivneeg Ixayees dim ntawm txoj kev quabyuam.

Yauxej thiab Maivliag ua txhua yam raws li Mauxes tej kevcai.

Cov tub txawjntse

Yexus yug hauv lub moos Npelehees hauv Yudia tebhaws thaum lub sijhawm Helauj ua vajntxwv. Cov tub txawjntse tuaj sab hnuv tuaj tuaj rau Yeluxalees. Lawv nug Hejlauj tias, “Tus metub uas yug los ua cov neeg Yudais tus vajntxwv nyob qhov twg? Peb tau pom nws lub hnuv qub tawm tuaj, thiab peb tuaj pehawm nws.”

Thaum vajntxwv Helauj hnov txog zaj no, nws thiab tej neeg hauv Yeluxalees nyuajsiab heev. Nws thiaj li hu cov povthawj hlob thiab cov xibhwb qhia Vajtswv kevcai (cov kws Vajtswv txojlus) thiab tshawb nrhiav los ntawm lawv seb tus Cawmdim uas muaj luscog tseg txog lawm yug los rau qhov twg tiag?

Lawv teb Helauj tias, “Nyob rau hauv Npelehees, hauv Yudia tebhaws, vim rau qhov tus xibhwb cev Vajtswv lus tau sau tseg tias: *Thiab koj, Npelehees, Yudia daim av, txawm yog koj yog ib lub moos me me hauv Yudia xwb los, tawm hauv koj tuaj yuav muaj ib tug los ua Tus Tswv yug yaj rau kuv haivneeg Ixayees.*”³³

Tomqab ntawd Helauj txawm hu cov tub txawjntse mus cuag nws ntsiag to thiab tshawb nrhiav tau los ntawm lawv tias lub sijhawm twg lub hnuv qub tawm tuaj. Nws thiaj li kom lawv mus rau lub moos Npelehees. Nws hais rau lawv tias, “Mus thiab ua tibzoo nrhiav tus metub, thiab thaum nej nrhiav tau nws lawm, qhia rau kuv paub, kuv los yuav mus thiab pehawm nws thiab.”

Tomqab lawv hnov vajntxwv hais li ntawd lawm, lawv txawm tawm mus. Thiab lub hnuv qub uas lawv caum qab tuaj rov tshwm rau lawv pom thiab lawv caum lub hnuv qub ntawd qab mus, mus txog thaum lub hnuv qub ntawd nre rau qhov chaw uas tus metub nyob. Lawv zoosiab heev li uas lawv rov pom lub hnuv qub dua. Lawv mus rau hauv lub tsev thiab pom tus metub nrog rau nws niam uas yog Maivliag. Lawv txhos caug, thiab lawv pehawm nws. Lawv txawm qhib lawv tej khoom plig thiab muab rau nws: *kub, tshuaj tsw qab, thiab roj tsw qab.*³⁴

February, 4 B.C., and later

Tiamsis Vajtswv hais rau lawv hauv nruab dabntub kom lawv tsis txhob rov mus cuag Helauj lawm. Yog li lawv thiaj li taug lwm txoj kev rov mus tsev lawm.

Mus rau Iyiv

Tomqab cov tub txawjntse rov qab lawm, Tustswv tus timtswv los ua npausuav rau Yauxej tias, “Cia li sawv, coj tus metub thiab tus metub niam, thiab mus rau Iyiv tebchaws. Mus nyob rau nrad txog thaum kuv kom koj rov los. Helauj tabtom nrhiav tus metub thiab yuav muab nws tua povtseg.”

Yauxej sawv thaum ib taghmo, coj tus metub thiab tus metub niam mus rau Iyiv tebchaws. Lawv nyob rau nrad mus txog thaum Helauj tuag. Tej uas tshwm no muaj raws li Tustswv tau hais rau nws tus tubqhe Hauxeyas lawm tias: *Kuv hu kuv tus Tub tawm hauv Iyiv los.*³⁵

Thaum Helauj paub tias cov tub txawjntse dag nws lawm, nws chim heev li thiab nws tau txib tubrog mus muab cov menyuum tub uas nyob hauv Npelehees tua tagrho thiab puavleej tua tej menyuum tub uas nyob ib cheebtsam ntawm Npelehees thiab, tua cov uas nyuam qhuav yug mus txog cov uas muaj ob xyoo, raws li lub sijhawm uas nws tau paub los ntawm cov tub txawjntse. Tej uas tshwm tuaj no tiav raws li xibhwb cev Vajtswv lus Yelemis hais tseg:

*Hnov ib lub suab quaj hauv Lamas tuaj!
Kev quajntsuag thiab suab quaj lwjsiab ntsuav
Laxees quaj nws tej menyuum
Thiab tsis kam leejtwg nplig nws siab
Vim rau qhov lawv tsis nyob lawm.*³⁶

Tiamsis thaum Helauj tuag lawm, Tustswv tus timtswv tshwm los rau Yauxej hauv kev npausuav thaum nws tseem nyob hauv Iyiv tebchaws thiab hais rau nws tias, “Cia li sawv, coj tus metub thiab tus metub niam, thiab rov mus rau tebchaws Ixayees. Cov uas yuav tua tus metub twb tuag tag lawm.”

Yauxej thiaj li sawv los, coj tus metub thiab tus metub niam, thiab rov los rau Ixayees tebchaws. Tiamsis thaum Yauxej hnov hais tias, “Akhelaus sawv los ua vajntxwv hloov nws txiv Helauj chaw,” Yauxej ntshai rov qab mus. Tus timtswv rov los ua npausuav rau Yauxej pom kom nws rov mus rau Kalilais. Yauxej tsuam chaw nyob rau ntawd. Thiab tej lus uas cov xibhwb cev Vajtswv lus tau hais tseg lawm tiav: Yexus raug hu tias yog neeg Naxale.*

** Raws li Yaxayas 11:1- Tus Cawmdim yog ib tug neeg Naxalev, ib tug kaus uas nthaw thiab loj hlob ntawm vajntxwv Daviv cajces tuaj.*

Bethlehem, Egypt, Nazareth

Tus Metub Yexus

Tus metub Yexus loj hlob thiab khov kho thiab puvnpo rau txoj kev txawjntse, thiab Vajtswv txoj kev hlub nyob nrog nraim nws.

Txhua xyoo nws txiv thiab nws niam coj nws mus rau Yeluxalees mus koom kev nquam toj nquam pes ua Kevcai Hla Dhau. Thiab thaum nws muaj kaum ob xyoos, lawv mus koom kev nquam toj nquam pes raws li lawv niaj xyoo mus.

Thaum kev nquam toj nquam pes dhau lawm thiab tej neeg pib rov mus tsev som zaws lawm, tiamsis tus metub Yexus tseem nyob hauv Yeluxalees, nws txiv thiab nws niam tsis paub tias nws tseem nyob hauv Yeluxalees. Maivliag thiab Yauxej xav tias nws nrog tej nruabze taug kev los uake lawm xwb, tiamsis thaum nkawd twb taug kev mus ib hnub ke lawm, nkawd mam li tig nrhiav tus metub. Thaum nkawd nrhiav tsis tau nws, nkawd thiaj li rov mus rau pem Yeluxalees saib nws puas nyob ped.

Ob hnub tomqab nkawd pom nws nyob hauv lub tuamtsev, tus metub zaum nruab nrab hauv cov kws qhia Vajtswv tej kevcai, nws mloog lawv tham thiab nug lawv. Tus metub txoj kev txawjntse thiab nws tej lus teb uas nws teb lawv ua rau lawv xav tsis thoob li.

Tus metub txiv thiab niam xav tsis thoob li rau qhov uas nkawd pom nws nyob hauv lub tuamtsev. Nws niam nug nws tias, “Metub, vim licas koj ua li no rau wb? Saib maj, koj txiv thiab kuv wb nyuajsiab npaum licas rau koj!”

Nws nug nkawd tias, “Vim licas neb nrhiav kuv? Neb tsis paub lov, tias kuv yuav tsum nyob hauv kuv Txiv lub tsev?” Tabsis nkawd tsis totaub tej uas nws hais rau nkawd.

Yog li ntawd tus metub thiaj li nrog nkawd rov qab los mus rau Naxalev lawm. Thiab nws mloog nkawd lus.

Nws niam khaws txhua yam uas tshwm los no rau hauv nruab siab. Thiab Yexus loj hlob tuaj muaj txoj kev txawjntse thiab *nws ua haum Vajtswv thiab neeg siab.*³⁷